

Rome

Paul Ana Fef Rome Isah

Roube'aten Ana Tur

Paul ana fef Rome sabuw isah kirum, saise hita'itin naatu i ana nanawan isan hitayabuna. Anayabin yakitifuw Rome ekaleisia bainanawanih isan. Ana nanawan yayakitifuw i boro Kiriisiyan wanawanahimaim bairi mar kafai hitama isah tabow, saise hitibais au Spain tan isan. Paul ana fef kikirum anayabin i kok takubuna ekaleisia ana yawas naatu ana baitumatum i hitaso'ob gewas isan. Paul ana fef kikirum wanawanan i ana tur ana binan tutufin etei ana'an gagamih auman kubuna hinowar.

Paul sabuw hai merar yiy ana yoyoban isan hai tur eo'owen ufunamaim ana fefemaim tur ukwarih eorereb. Tur gewasinamaim God mi'itube ana sabuw eyayamutufurih, naatu baitumatumamaim ebubusuruf naatu ebisawar (1.17)

Paul ana tur ukwarin wowab bunai maiye eo, "Orot babin etei, Jew naatu Ufun Sabuw etei i boro hinayamutufurih God bairi hinama. Anayabin etei i bowabow kakafin ana fair babanamaim hima'am." Sabuw hai baitumatumamaim God yamutufurih hina bairi ta'imom himatar Jesu Keriso wabinamaim. Paul iban maiye yawas boubun ana itinin mi'itube eo hinowar, hai baita'ay boubun God bairi hibita'ay imaim hina Keriso bairi hituwbonen. Yait bitumatum i tufuw Godamaim bai naatu bowabow kakafih morob hairi hai fairane God Anunin Kakafiin botait tit. Teten 5-6 wanawananamaim Paul iban maiye God ana ofafar naatu God Anunin kakafiin ana fair baitumatumayah hai yawasamaim ema'am isan idudur hinowar.

Imaibo tur abarayah Jew naatu Ufun Sabuw yabin en baise God ana yakitifuwenamaim buwih hirun. Tur yomanin asa'ubin isan eo, Jew hai routawiyen Jesu isan i God ana yakitifuwen turin i ana manaw ana kabeber Jesu Keriso'omaim sabuw etei buwih hina i ana yawas wanawanan hirun. Naatu i ebitumatum Jew boro men mar etei Jesu hinakwahirimih.

Tur baisawarin isan i ana tur naatu God bora'ara'ahin ana tur auman yari'iy kirum sawar.

Fef wanawanan tur iti na'atube hi'a'asgidigd

Roubé'aten naatu tur ukwarin (1.1-17)

Orot ana kok yawas (1.18–3.20)

God orot yawas baitin isan ana ef (3.21–4.25)

Yawas boubun Keriso wanawananamaim (5.1–8.39)

Israel sabuw i God ana yakitifuwenamaim ema'am (9.1–11.36)

Kirisiyan ana bonawiyen (12.1–15.13)

Tur yomanin naatu merarayow (15.14–16.27)

1 ^{1a}Ayu Paul, Jesu Keriso ana akir wairafin, tur abarin isan rubinu, naatu Tur Gewasin binan isan God eafu atit. ^{2b}Iti Tur Gewasin i marasika God ana dinab hai veyá'amaim eomatanih, dinab oro'orot Buk Kakafiyinamaim hikirum. ³Iti tur ana an gagamin i Natun it ata Regah Jesu Keriso isan. Biyanane ana tufuw i David ana rara'ane tufuw. ⁴Baise i Ayubin ana kakafiyinamaim morobone mimisir ana veyá, bebeyan ebi'obaiyt turobe i, i God Natun fairin. ^{5c}I wanawananamaim naatu i wabin isan ayu manaw kabeber itu ana tur abarayan amatar,^d saise tafaram wanawanan Ufun Sabuw anabuwih hinan tur hinitumatum naatu hinabosiyasiyar. ⁶Naatu kwa auman i nati sabuw wanawanahimaim Jesu Keriso nowan matar isan God eafi. ^{7e}Naatu Rome wanawanan kwa iyab God iyabuwi naatu rubini i ana sabuwamih kwamatar kwama'am etei, isa ayoyoyoban manaw kabeber, tufuw Tamat Godane naatu ata Regah Jesu Keriso'one mar etei kwa isa nama.

Merarayow Ana Yoyoban

⁸Wantoro'ot Jesu Keriso wabinamaim ayu au God ana merar ayiy kwa etei isa, anayabin kwa a baitumatum i tuw ra'at tafaram wanawanan sabuw etei tenonowar. ⁹God isan dogorou tutufin etei abow i Natun ana tur gewasin abibinan, i so'ob, ayu mar etei kwa anunuhi. ^{10f}Matanfufur isa ayoyoyoban, naatu au yoyobanamaim God abifefeyan nakokok na'at boun ana veyá ef nabotawiy isou naham anan kwa aninanawani.

¹¹Au kok gagamin i mi'itube kwa ayumat ata itin, saise ayubit ana usar kwa atit imaim a fair kwatab. ¹²Iti tur i men ayu akisu kwa fair bait isan ao'omih, baise kwa auman ayu koufair kwanitu bairi tanibaibaisbonen

^a 1.1 Act 9.15 ^b 1.2 Rom 16.25-26 ^c 1.5 Act 26.16-18; Gal 2.7-9 ^d 1.5 it manaw kabeber itit tur abarayah tamatar ^e 1.7 Num 6.25-26 ^f 1.10 Act 19.21; Rom 15.23

ata baitumatum nakwat isan ao'o. ^{13g}Taitu tuwa'inah ayu akokok tain anayai kwanaso'ob, mar mounurih na'in abogaigiwas atan kwa ata'iti, saise kwa wanawanamaim Ufun Sabuw afa atabow hitan baitumatum wanawanan hitarun, nati'imaim abow hina baitumatum wanawanan hirur na'atube. Baise sawar mounurih maiyow ayu au ef hirufutifut tama tanan iti boun tatit. ¹⁴Ayu i sabuw etei'imak isah bai'akiramih atit, Greek sabuw naatu sabuw iyab men Greek, na'atube sabuw so'ob wairafih naatu men so'ob wairafih etei'imak isah anabow anibaisih. ¹⁵Ana'an nati isan ayu akokok kwanekwan tur gewasin kwa iyab nati Rome kwama'ama auman isa anabinan.

^{16h}Ayu Tur Gewasin ao'orereb isan men biyou eo'ohow, anayabin God ana fair i ef iti'imaim tit sabuw iyab tibitumatum ebiyawasih. Iti yawas i wantoro'ot Jew sabuw isah, baise Ufun Sabuw auman. ¹⁷ⁱAnayabin yawas mutufurin Godane i tur gewasinamaim orot babin eyayamutufurih, baitumatumamaim ebubusuruf naatu boro baitumatumamaim nasawar. Buk Atamaninamaim hikikirum iti na'atube eo,

“Orot ana yawas mutufurin boro baitumatumamaim nama.”

Sabuw Kakafin Sinafuyah God Ana Baimakiy Boro Hinab

¹⁸Sabuw bowabow kakafih sinafuyah naatu sabuw tafa'asarih, i hai kakafinamaim turobe ana gewasin esumisum, imih maramaim God ana ya so'ar tit ibirerereb nati sabuw isah. ^{19j}Sawar tutufin etei i rereb yah hi'itah tesoso'ob, anayabin God etei bebeyanamaim sinaf tibirerereb.

^{20k}Anamaim God tafaram sinaf mamatar ana veya, God ana yawas wa'iwa'irin, ana fair wanatowanin naatu i ana itinin etei i sawar sinaf himamataramaim bebeyah hi'itan hiso'ob, imih boro men yait ta God su'ubina'e nao nifufuwenamih.

^{21l}Nati sabuw i God hisu'ub, baise men kafa'imo God hirouw tebora'ara'ah, o merarayow tibitinimih. Nati efanin i hai not bonawiyih kwarikwarisen wanawanan hirun dogoroh eowarar naatu gugumafut.

^{22m}Basit i not wairafih hirouw teo, baise hai not botabir hina koko'aw na'atube himatar, ²³ⁿGod morob atin bonamanamarin kwafirina'e i hitatabir orot hai yumatabe o mamu, o harufur, uma'ar, kok, i hai yumatabe hitar hima tekwakwafirih.

²⁴Isan imih God nati sabuw ihamiyih hitit bowabow kakafih ta ta wanawanan hirun. Dogoroh ana kok na'atube tisisinaf, orot baibin hai faifuw hikwahir naatu baibin ibo orot hai ar hikwahir taiyuwih hi'in hisesebar biyah tebobokarikarit. ²⁵Turobe God nowan i hibotabir efanin

^g 1.13 Act 19.21 ^h 1.16 Mak 8.38; Act 13.46; 1Cor 1.18-24 ⁱ 1.17 Hab 2.4; Rom 3.21-22
^j 1.19 Act 14.15-17; 17.24-28 ^k 1.20 Job 12.7-9; Psa 19.1 ^l 1.21 Eph 4.17-18 ^m 1.22 Jer 10.14; 1Cor 1.20 ⁿ 1.23 Deu 4.15-19; Psa 106.20

baifuwen hiyari'iy, naatu God Sawar Sinafuyan kwafirina'e, hitatabir sawar i sinaf himamatar hai fair babahimaim hirun hikwafirih isah tebowabow. Baise ana gewasin sabuw i God akisinamo hitakwafir hitabora'ara'ah wanatowan, wanatowan, *Amen*.

²⁶ Ana an iti isan God ihamiyih insesebar naniyan kakafin^o anababatun hibai tisisinaf. Baibin oro'orot hai ar hikwahir, i taiyuwih hi'in tibisesebar kwanekwan. ²⁷ Ef nati ta'imon oro'orot auman baibin hai faifuw hikwahir i taiyuwih baisesebar isan tibifi'afi. Naatu oro'orot taiyuwih hi'in tibisesebar kwanekwan. Ana an nati isan i taiyuwih hai kakafinamaim baimakiy tebaib.

²⁸ Anayabin sabuw God ana so'ob anababatun bain isan hai not kowarar naatu hirutawiy, imih God ihamiyih hitit not kwarikwarisen hibai hima kakafih men hitasisinaf i hima tisisinaf.

²⁹ Dogoroh wanawanan bowabow kakafih ta ta etei awan karatan: not kakafih, kabat, tafa'asar, bobowen, sabuw rouw morob; baiyow, baifufuwen, nuw okwanekwan, yanuw, ³⁰ koutabitabir, God baifa'ifa'in, kakaf en, nuw furuwen, ora'ara'at, naatu bowabow kakafih sinaf isan hai ef boubuh tibimamataren. Naatu hinah tamah fanah tibifanasair. ³¹ Nati sabuw i hai naniyan en, aurih bosunusunub en, yabow, baiwan babanen en. ³² Naatu God ana ofafaramaim sabuw iti na'atube hinasisinaf isan hinamomorob i hiso'ob, baise i hima kakafin tisisinaf. Naatu sabuw afa bowabow iti na'atube tisisinaf auman isah i baibasit hitih hima tisisinaf.

God Ana Baibatiyen

2 ¹ Isan imih kwa isa men ef ta ema'am boro imaim kwanabat sabuw afa hai kakafih kwanasebmatar ubar kwanitih, anayabin nati kakafin ta'imon kwa auman kwasisinaf. ² Baise God turobe tafanamaim bat sabuw iyab kakafih tisisinaf isan baibatiyen ebitih i taso'ob. ³ Imih o orot maiyow, sawar kakafin o kuisinaf na'atube sabuw tisisinaf isan o kubibatiyih^r o kunotanot God ana baibatiyen boro inahaiw? ⁴ Ai o God ana baiwanbabanen, ana yawanen, ana yatenub i ku'i'itin furuw. Naatu o iwanbabani dogor baikitabirin isan enanawiyi kwa'i'itin ai en?

⁵ Baise anayabin kwa i kwafokar naatu dogor kwahir, a baimakiy kwama kwatutu ra'at eyey ana Veya'amaim God ana yaso'ar bebeyan nab natit turobe'emaim tafaram boro nabibatiy kwana'itin. ⁶ God boro ta'ita'imon abowabow^u ana fofonin a baiyan nit. ⁷ Sabuw iyab yatehnuh hima gewasin tisisinaf, naatu marakaw, baifa'en, ma wanatowan tinunuwih boro ma'ama wanatowanin nitih. ⁸ Baise

^o 1.26 1, 26 baiwa'an isan iuwiwiwirihi ^p 1.27 Lev 18.22; 20.13; 1Cor 6.9 ^q 2.1 Mat 7.1-2; Jn 8.7 ^r 2.3 isebmatar ubar kubitih ^s 2.4 Eph 1.7; 2Pet 3.15 ^t 2.6 Psa 62.12; Pro 24.12; Mat 16.27; 2Cor 5.10 ^u 2.6 mi'itube kwabowabow na'atube ^v 2.8 2Th 1.8

sabuw iyab i taiyuwih hai yawas tinunuwih, naatu turobe hikwahir kakafih tibi'ufunun, God ana gagamat naatu ana yaso'ar boro tafah yan nisuwai nare. ⁹Sabuw iyab bowabow kakafih tisisinaf i boro bai'akir naatu biyababan gagamin maiyow hinab. Jew sabuw biyahimaim boro nabusuruf nan Ufun Sabuw biyahimaim nisawar. ¹⁰Baise sabuw iyab bowabow gewasih tisisinaf, God boro fair, baifa'en, borara'aten naatu tufuw nitih, Jew sabuw biyahimaim boro nabusuruf nan Ufun Sabuw biyahimaim nisawar. ¹¹Anayabin God i ana fofoninamaim sabuw bai'ubaren ebitih, men ta aukoun ebatabatamih.

¹²Sabuw iyab ofafar ufunane hima kakafin hisisinaf auman boro baimakiy hinab. Naatu sabuw iyab ofafar babanamaim hima kakafin hisisinaf boro ofafar nibatiyih. ¹³Anayabin sabuw i boro men ofafar tenowaramaim nayamutufurih God matanamaim hinatitamih, en baise ofafar hinowar tibi'ufunun boro nayamutufurih. ¹⁴^wEteni Sabuw aurih ofafar i en, baise abisa i hai yawasamaim eo na'atube tisisinaf i hai ofafar turaban nati, basit i aurih ofafar anababatun i en. ¹⁵Anayabin kakafin gewasin kousibin ana not i ofafar na'atube dogoromaim ema'am boro a tur na'owen, a kakafin isan boro ubar nit nakusairi, naatu a gewasin isan boro natafafari. ¹⁶Tur Gewasin iti ao'orereb na'atube boro namatar. Nati baibatebat ana vey a God boro Jesu Keriso narubin sabuw hai not wa'iwa'irih etei boro nabow hinatit rerereb yah naya.

¹⁷Baise kwa Jew sabuw kwarouw kwao, naatu ofafar tafanamaim kwabat God isan kwanao ra'at. ¹⁸God ana kokok sinaf isan i kwaso'ob, naatu kakafin gewasin hairi kusibin isan i ofafaramaim ebi'obaiyi. ¹⁹Taiyuw kwaso'ob, kwa i matah fim hai nabatanayah, gugumin ma'ayah hai marakaw ²⁰^xkoko'aw sabuw hai roube'atenayah, bereberefy hai bai'obaiyenayan, naatu ofafar wanawanan ana kinitur tutufin etei naatu turobe etei auman i kwaso'ob. ²¹^ySabuw kwabi'obaibiyih, baise kwa taiyuwiban kwabi'obaiyi ai en? A binanumaim kwao, "Men kwanabain" Baise o kubabain ai en? ²²Sabuw turahinah aawah ufun na isan i kuo'otanih, baise o turanah aawah ufuh kwenan ai en? Umataratar baifa'ifa'ih irouw kuo, baise hai kwafiren bar wanawanan o kubabain ai en? ²³God ana ofafar isan i kuo'ora'ara'at, baise ofafar i'astu'ub God biya'ohow kubitiniban kui'itin ai en? ²⁴^zBuk Atamaninamaim iti na'atube hikirum, "Eteni Sabuw God wabin tibigigim anayabin kwa Jew sabuw asinafumaim."^a

²⁵O ofafar inabobosiyasiyar na'at, a'ar hi'a'afuw i boro nan ana'an gagamin namatar, baise ofafar ina'a'astu'ub, o a'ar kanabin hi'a'afuw ana'itin i afuwina'e.^b ²⁶^cSabuw iyab hai ar kanabih men hi'afuw,

^w 2.14 Act 10.35 ^x 2.20 2Tim 3.5 ^y 2.21 Mat 23.3-4 ^z 2.24 Isa 52.5 ^a 2.24 Ezk 36.22 ^b 2.25 gewasin a'ar men hita'afuw ^c 2.26 Gal 5.6

baise ofafar eo biyunih na'atube tebobosiyasiyar, nati sabuw i sabuw iyab hai ar kanabih hi'a'afuw hinasairih. ²⁷Orot yait biyanane ana ar kanabin men hi'afuw, baise ofafar i ebobosiyasiyar, o boro nasiksairi, anayabin o i ofafar iso'ob naatu a'ar kanabin hi'afuw, baise ofafar men kubobosiyasiyar. ²⁸O yait Jew orot kumamatar i men biya ufunane hi'a'afuw imaim o ina Jew orot kumamataramih. ²⁹^dEn baise, Jew orot anababatun i dogor wanawanan. Naatu afu'afuw anababatun i dogor wanawananamaim Anun Kakafiyin esisinaf, men biya. Naatu bora'ara'aten etei i Godane nan inab men orot biyahine.

God Ana Bosunusunub

3 ¹Jew orot inamamatar boro Ufun Sabuw inanatabirih? Naatu a'ar kanabin hina'a'afuw ana gewasin i boro men tomar inab? ²Ef tata'ane etei i gewasih, wantoro'ot God ana tur i Jew sabuw hitutumih hitih.

³Baise sabuw afa men hibitumitum isan, kwanotanot God ana omatanen isan boro men nabosunusunub?^e ⁴/En anababatun! God ana tur i mar etei turobe, baise sabuw i baifuwenayah. Buk Atamaninamaim iti na'atube hikirum,

“Tur awamaim etitit i mar etei asinafumaim initurobe,
naatu baibatien ana vey
hai tur boro inisnowah.”

⁵Baise it ata sinaf kakafihimaim God ana sinaf gewasin bebeyan natit sabuw hina'i'itin ana vey, it boro mi'itube tanao? God baifuwenamaim yan so'ar baimakiy ebitit? it i anababatun taikoko'aw tao kwanekwan. ⁶Nati tur i men turobe tao'omih, anayabin sinaf nati na'atube nama'am, God boro mi'itube tafaram ana sabuw nibatiyih?

⁷Orot babin ta boro nagam nao, “Ayu i men bosunusunubayan, baise au bowabowamaim turobe God nowan tit irerereb sabuw hi'itin God hifai tebobora'ara'ah, aisim God ayu kakafu rouw eo ekukusairu?” ⁸Naatu iban boro kwanao maiye, kakafin tanasinaf, saise sinaf gewasin boro ine natit. Sabuw afa ayu iti na'atube o hirouw higam tiu'uwu, God nati sabuw boro baimakiy nitih.

Men Yait Ta Gewasin

⁹Iti sawar ana an i abisa? It Jew ata gewasin i ra'at Eteni Sabuw tanatabirih? En anababatun! Jew sabuw naatu Eteni Sabuw etei i bowabow kakafin ana fair babanamaim tama'am. ¹⁰^hBuk Atamaninamaim iti na'atube hikirum,

^d 2.29 Deu 30.6; Col 2.11 ^e 3.3 nasinaf yabin namatar? ^f 3.4 Psa 51.4 ^g 3.9 Rom 1.18–2.24; 3.23 ^h 3.10–12 Psa 14.1–3; 53.1–3

- “Orot babin men yait ta ana ef mutufurin, men kafa’imo orot ta’imon;
¹¹ Men yait ta ana not rerekabin,
 men yait ta God enunuwih.
¹² Etei hitatabir kouh God hitin,
 etei hisinaf kakaf hikowarar,
 men kafa’imo yait ta gewasin esisinaf,
 men kafa’imo orot ta’imon.ⁱ
¹³ ^jSikah dub i tahahab sabuw tetotonan,
 menah kautabitabir ana efan matar,
 ufurihimaim kok tuwamorob awakirurin awan karatan.”
¹⁴ ^k“Awah i orarafen awan karatan naatu tenakuyakuy.”
¹⁵ ^l“Iti sabuw umah i rara awan karatan.
¹⁶ Menamaim tenan ma kakaf naatu gurugurusen mar etei imaim
 emamatar,
¹⁷ Naatu tufuwamaim ma ana ef i men hiso’ob.
¹⁸ ^mNaatu God matanamaim men kafa’imo tibibiruw.”
¹⁹ Imih it ata so’obamaim ofafar hikikirum i sabuw iyab ofafar
 babanamaim tema’am isah, saise awah etei nabofafaren, naatu tafaram
 wanawanan sabuw etei nabow nan God ana baibatienamaim hinatit.
²⁰ ⁿIsan imih God boro men sabuw ofafar tebobosiyasiyar imaim hai ef
 mutufurin narouw nabowamih, ofafar i orot babin ana bowabow kakafin
 botait ebirerereb.
²¹ Baise boun God sabuw yamutufurih isan ana ef i boubun botawiy.
 Moses naatu dinab oro’orot nati isan i ofafaramaim hio’oreb tanowar,
 men ofafar tanabi’ufununimaim nabuwitamih. ²² ^oIt yamutufuren boubun
 Godane enan i sabuw iyab Jesu Keriso tibitumitum imaim enan, naatu
 God matanamaim it etei ata’itinin i men tata’amih. ²³ Anayabin sabuw
 etei bowabow kakafin hisinaf naatu God ana gewasin bain isan umah
 kabom. ²⁴ ^pBaise manaw kabeber God ana siwar na’atube Jesu Keriso
 wanawananamaim na it ata kakafihine tubunit^q botaitit tatit. ²⁵ Bowabow
 kakafin notawiyen isan God Keriso biyan siboromih yai, ana rara suwa re
 saise baitumatumamaim tanan biyan tanatit. Sawar iti na’atube sinaf saise
 bebeyan ti’obaiyit i ana ef i mutufurin. Anayabin I ana yatenub kakafiyn
 imaim bowabow kakafih marasika tasisinaf isubun rabon. ²⁶ Naatu iti boun
 it ata veyamaim i turobe ebi’obaiyit i ana ef mutufurin. Imih i karam
 sabuw iyab Jesu tibitumitum boro nafufunih gewas nayamutufurih.
²⁷ Isan imih it boro abisa isan tanaora’ara’at? Ofafar
 tabobosiyasiyar isan tarara’at? En anababaturun! Baise baitumatum

ⁱ 3.10-12 Ecc 7.20 ^j 3.13 Psa 5.9; 140.3 ^k 3.14 Psa 10.7 ^l 3.15-17 Isa 59.7-8

^m 3.18 Psa 36.1 ⁿ 3.20 Psa 143.2; Rom 7.7; Gal 2.16 ^o 3.22 Gal 2.16 ^p 3.24 Rom 5.1

^q 3.24 kusouwit yamutufurit

isan i tarara'at. ²⁸ Anayabin sabuw iyab tibitumatum i hai ef mutufurin rouw ebowabow men ofafaramih. ²⁹ Imih kwanotanot God i Jew sabuw akisih hai God? Ai kwanotanot Ufun Sabuw auman hai God? Baise anao kwananowar, iti God i Ufun Sabuw auman hai God. ³⁰ Kwanaso'ob God i ta'imon men rou'ab, imih sabuw iyab hai ar kanabih hi'afuw o men hi'afuw etei i baitumatum ta'imonamaim hiyawas. ³¹ Kwanotanot iti baitumatumamaim aki ofafar abobosa'ir? En anababatun, aki i ofafar aiwa'an tit ana efan bai ebirerereb.

Baitumatumamaim Abraham Yamutufur

4 ¹ Abraham it uwat regah biyanamaim sawar abisa himatar, imaim itah soso'ob isah boro mi'itube tanao? ² Anayabin Abraham ana bowabowamaim yamutufuren nabaib na'at, i karam ana ef ema'am boro nao ra'ara'at, baise men God nanamaim. ³ "En baise, Buk Atamaninamaim iti na'atube eo? "Abraham God itumitum naatu i ana baitumatumamaim God yamutufuren ana i'inanen itin." ⁴ Orot ebowabow isan tibibaiyan, nati i men ana siwar tibitin baise ana bowabow isan baiyan tibitin. ⁵ Orot yait ana bowabow men i'itin, baise ibitumitum God i sabuw kakafih eyayamutufurih. Nati orot boro yamutufuren ana i'inanen Godane nab, anayabin ebitumatum, men ana bowabowamaim. ⁶ Buk Atamaninamaim David i tur ta'imon eo, orot yait yamutufuren ana i'inanen God bitin boro baigegewasin nab, men ana bowabowamaim. Imih David iti na'atube eorereb eo,

⁷ "Orot yait

ana sinaf kakafih nonotawiyen boro nigegevasin,

naatu orot yait

ana bowabow kakafih sasamen boro nigegevasin.

⁸ Nati orot i boro baigegewasin nab,

i ana bowabow kakafin Regah isan sisinaf boro men imaim ubar nitin na'umih!"

⁹ Iti baigegewasin i sabuw iyab hai ar kanabih hi'a'afuw akisih isah, ai hai ar afuwa'e tema'ama auman isah? Baise boun tanowar, "Abraham i ana baitumatumamaim God dogoron botabir ana ef mutufurin rouw eo."

¹⁰ Iti sawar i mi'itube matar? Abraham ana ar afuwina'e ma'am ana veyamatar o ana ar hi'a'afuw ufunamaim matar? Baise anao kwananowar, Abraham i wan God ana baibasit wanawanan run, imaibo ana ar i uf hi'afuw. ¹¹ Naatu nati ar afu'afuw i Abraham ana baitumatumamaim

^r 3.29 Rom 10.12 ^s 3.30 Deu 6.4; Gal 3.20 ^t 3.31 Mat 5.17 ^u 4.3 Gen 15.6; Gal 3.6

^v 4.7-8 Psa 32.1-2 ^w 4.11 Gen 17.10-11

yamutufuren baib ana i'inanen. Iti sawar i Abraham ana ar kanabin auman ma'am ana veyamatar. Isan imih sabuw iyab hai ar kanabih auman baise hina baitumatumayah himamatar tamah i Abraham, anayabin i hai baitumatumamaim God hai ef mutufurin rouw eorereb. ¹²Naatu Abraham auman i tamah, men ar afu'afuw akisin, baise Abraham ana baitumatumamaim ana'ar kanabin auman ma reremor tibi'ufunun auman.

¹³xAbraham wawawan bairi God tafaram nowahimih baitih isan eo'omatanih ana veyam i men ofafar bobosiyasiyar isan. Baise ana baitumatumamaim ana ef mumutufur isan. ¹⁴yAnayabin sabuw iyab ofafar tebobosiyasiyar isan God ana omatanen nabitih na'at, baitumatum i boro nan ana'an en namatar naatu God ana omatanen i owararin. ¹⁵zOfafaramaim ya so'ar emamatar, baise efan menamaim ofafar men ema'am, asto'oben men ema'ama. ¹⁶aIsan imih omatanen etei i baitumatumamaim emamatar, saise manaw kabeber Godane nan Abraham wawawan etei isah, men sabuw iyab ofafar tebobosiyasiyar akisih isah. Baise baitumatumayah auman Abraham bitumatum na'atube. Anayabin it etei ayubit isanane tamat i Abraham. ¹⁷bBukamaim iti na'atube eo, "Ayu o asinafi tafaram tutufin etei tamah imatar. Imih iti omatanen isan Abraham God ana tur itumitum," anayabin God i murumurubih ebiyayawasih, naatu sawar yanonowat eo hitit tibirerereb. ¹⁸cAbraham sawar God eo'omatan men itah, baise baitumatumamaim nuhin fot ma kakaif yomaninamaim tafaram maumurih na'in tamah matar. Bukamaim isan eo na'atube matar, "O natunat boro daman na'atube." ¹⁹dAbraham ana kwamur i ra'at, biyan i morob, naatu aawan Sarah yan wanawanan kek ana bar auman i morob, baise Abraham ana baitumatum i men ririm. ²⁰Naatu men kafa'imo God ana omatanen isan erekasiy auman ma'amih, baise ana baitumatum eabar totofar bat God ana merar yi bora'ara'ah. ²¹Abraham ana naniyan tutufin etei bai so'ob God i fairin, abisa isan eo'omatan i karam boro nasinaf. ²²eAna'an iti isan, Abraham ana baitumatumamaim ana yawas mumutufur isan God bai. ²³Iti tur, "Ana ef mutufurinamaim God baib" i men Abraham akisin isan hikirum. ²⁴Baise it auman isat hikirum, it iyabowat ata ef emumutufur naatu iyabowat tabitumatum God Jesu ata Regah morobone biyawas maiye isan. ²⁵fJesu it ata kakafin isan God ibasit hi'asabun, baise morobone iyawas maiye, saise it tanawiyit tanan God nanamaim tayamutufurit.

* 4.13 Gen 17.4-6; 22.17-18; Gal 3.29 y 4.14 Gal 3.18 z 4.15 Rom 3.20; 5.13 a 4.16 Gal 3.7 b 4.17 Gen 17.5 c 4.18 Gen 15.5 d 4.19 Gen 17.17 e 4.22 Gen 15.6 f 4.25 Isa 53.4-5

Tufuw Naatu Yasisir

5 ¹Isan imih ata baitumatumamaim yamutufurit bonawiyit tana Jesu Keriso ana sinafumaim God bairi taitafentutur^s tama'am. ²Baitumatumamaim buwit tana manaw kabeber God nowan i'obaiyit taso'ob boun imaim tama'am. Naatu^h ana marakaw bonamanamarin bairi faram isan nuhit fot tama tabiyasisir. ³ⁱMen nati akisin, baise biyababan ta ta tabaib auman isan tabiyasisir, anayabin biyababanane baitafofor ebimatar, ⁴naatu baitafoforane ata yawas ewowowab, naatu nati yawasamaim it nuhifot ebitit. ⁵Naatu iti nuhifot tabaib boro men yababan nititamih, anayabin God ana yabow dogorot wanawanan Anun Kakafiyinane isuwai ra'iy, nati i God ana usar it ebitit.

⁶Anayabin it ata fair naatu ata baibais en tama'am God ana veyai inu'in imaim Keriso na tit ata kakafih isan morob. ⁷Men yait ta boro orot ana yawas mutufurin isan morobomih nakok, basit orot babin ta boro orot gewasin isan nakok. ⁸/Baise God ana yabow it bi'obaiyit i ra'at kwanekwan, it bowabow kakafin wanawanan tama'ama ana veyai Keriso isat morob.

⁹^kNaatu boun it i Keriso ana rara'amaim yamutufurit, baise men nati akisin, God ana yaso'arane auman iyawasit. ¹⁰Marasika it i God ana kamabiy sabuw, baise I Natun ana morobomaim it tana God ana tounuw tamatar, naatu men baitounuw akisin, baise God ana tufuw auman itit, i Natun ana yawasamaim it boro niyawasit. ¹¹Naatu men nati akisin, baise God isan taniyasisir anayabin ata Regah Jesu Keriso iyafar na God bairi taitounuw. ¹²^lTafaramamaim bowabow kakafin i orot ta'im'on biyanamaim matar, naatu i ana kakafinamaim morob matar, naatu sabuw etei hibusuruf himorob, anayabin sabuw etei kakafin hisinaf. ¹³^mBowabow kakafin tafaramamaim i wan matar, God ana ofafar i ufibo na. Imih bowabow kakafin ana tur Bukamaim en, anayabin ofafar en. ¹⁴Baise tanaso'ob, Adam ana veyai'ika busuruf na Moses ana veyai'amaim titit, orot babin etei morob nawiyih. Sabuw afa himomorob i men God ana obaiyunen Adam ea'astu'ub na'atube hi'a'astu'ub isan himorobomih, baise rara kakafinane etei himomorob.

Adam i ina'inan na'atube orot ta boro uf nan isan. ¹⁵Baise iti siwar ana baiyan en God ana manaw ana kabeberamaim bitit i ra'at kwanekwan. Men Adam ana bowabow kakafin na'atube'emih. Anayabin orot ta'im'on ana kakafinamaim sabuw etei himorob, baise orot ta'im'on Jesu Keriso

^s 5.1 tufuwamaim ^h 5.2 God ana'itininabe tanamatar ⁱ 5.3 Jas 1.2-3; 1Pet 1.5-7 ^j 5.8 Jn 3.16; 1Jn 4.10 ^k 5.9 Rom 1.18; 2.5; Eph 2.3-5 ^l 5.12 Gen 3.6; Rom 6.23
^m 5.13 Rom 4.15

ana manaw ana kabeberane God ana siwar gewasin bai na sabuw mounurih na'in tubunih yawas itih. ¹⁶Iban ao maiye, God ana siwar naatu Adam ana kakafin hairi hai itinin i men ta'imom. Anayabin orot ta'imom ana kakafinamaim baibatien na sabuw baimakiy hibai. Baise God ana siwar gewasin baiyan en nan ana maramaim sabuw mounurih na'in ata kakafihimaim tama'ama botaitit naatu yamutufurih tana God biyan tatit. ¹⁷Orot ta'imom ana kakafinamaim sabuw etei morob nawiyih, baise turobe orot ta'imom Jesu Keriso ana sinafumaim. God ana manaw ana kabeberamaim ef baimutufurin ana siwar gewasin bisuwai boro hini'aiwob Keriso wanawanamaim. ¹⁸ⁿIsan imih orot ta'imom ana kakafinamaim sabuw etei bonawiyih baimakiy bainamih hinan. Baise iban maiye Keriso bowabow gewasin sisinafumaim sabuw yamutufurih yawas bain ma isan ana siwar itih. ¹⁹^oAnayabin orot ta'imom ana fanasairamaim sabuw tutufin etei hi'af, imih orot ta'imom ana fanabowamaim sabuw etei hina hai ef mutufur. ²⁰Ofafar natit, saise bowabow kakafin nataub nara'at, baise efan menamaim bowabow kakafin toub erara'at God ana manaw ana kabeber nati'imaim auman i tafan ya'abar erara'at. ²¹^pIsan imih bowabow kakafinamaim nawiyit tan morob wan tayen, baise God ana manaw ana kabeberamaim ata Regah Jesu Keriso biyanamaim ata ef yamutufur ma'ama wanatowan itit.

Kakafinane Tamorob Baise Keriso'one Iyawasit

6 ¹Abistan boro tanao? It na'atuka tanama bowabow kakafih tanasinaf, saise God ana manaw ana kabeber tafan nayababar nara'at? ²Men karam! It i bowabow kakafinane tamorob, aisim biyat boro namatabir bowabow kakafinamaim nama maiye? ³^qNa'atube Keriso Jesu wanawanamaim kwarun bapataito kwabaib ana vey, morob auman ana bapataito kwabaib men kwaso'ob? ⁴^rIsan imih it ata bapataito'omaim Keriso bairi hubemaim tare, ana morob bairi tafaram, saise Keriso hubene Tamah ana fairamaim iyawas maiye mimisir na'atube, it auman tanamisir yawas boubunamaim tanama.

⁵I ana morobomaim it bairit iti na'atube tanikofan tanamomorob na'at, i ana misiramaim turobe boro bairit tanamisir maiye. ⁶^sAnayabin it biyat atamanin onaf afe'en Keriso hairi hi'onafih himomorob i taso'ob, saise biyat men tama bowabow kakafin isan ti'akiramih, ⁷Anayabin orot babin yait emomorob ana vey bowabow kakafin ana fairane ikitawiy tit. ⁸Naatu Keriso bairi tanamomorob na'at, tabitumatum i ema'amamaim it auman boro bairit tanama. ⁹Anayabin it etei taso'ob Keriso i morobone misir maiye, naatu boro men karam namorob maiye, morob ana fair i wasatan. ¹⁰Imih nati morob i momorob i

ⁿ 5.18 1Cor 15.22 ^o 5.19 Isa 53.11 ^p 5.21 Rom 6.23 ^q 6.3 Gal 3.27 ^r 6.4 Col 2.12

^s 6.6 Gal 5.24

sabuw etei hai bowabow kakafin isan mar ta'imon morob, mar moumurih na'in isan, baise yawas iti boun ema'am i God ana yawasamaim ema'ama.

¹¹Ef nati ta'imon, kwa taiyuw kwanasu'ubi, bowabow kakafinamaim kwa easbuni kwamorob, baise Jesu Keriso'one God ana yawasamaim boun kwama'am. ¹²Isan imih men kafa'imo kwanibasit bowabow kakafin kanab nabonawiy ana kok kakafih kwani'ufunun. ¹³Men biya turin kwanibasit bowabow kakafin nab ana not kakafih nasinafumih, baise nati efanin taiyuw biya God kwanitin, sabuw yawasihibe kwanasinaf men murubihibe. Naatu biya tutufin etei God ana kokok gewasih sinaf isan kwanitin. ¹⁴Bowabow kakafin men kafa'imo kwa isa ni'ukwarin, anayabin kwa i men ofafar babanamaim kwama'amamih, baise God ana manaw ana kabeber babanamaim kwama'am.

Gewasin Isan Kwani'akir

¹⁵Imih abisa boro tanao? Bowabow kakafin tanasinaf? Anayabin it men ofafar babanamaim tama'am baise God ana manaw ana kabeberamaim tama'am? Men karam! ¹⁶Kwaso'ob ai en, o yait taiyuw orot ta initin isan ini'akir inabobosiyasiyar, o i nati orot ana'akir wairafin babanamaim kuma'am. Imih o yait bowabow kakafin isan inabi'akir yomanin i morob, naatu God inabobosiyasiyar yomanin i yawas mutufurin. ¹⁷Baise God ana merar ayiy, anayabin marasika kwa i bowabow kakafin ana aiwobomaim kwama isan kwabi'akir. Baise boun dogor tutufin etei bai'obaiyen abit i kwabai kwabi'ufunun. ¹⁸Kwa i bowabow kakafinane hirufami kwatit, naatu kwana yawas gewasin isan kwabi'akir.

¹⁹Mar etei tao'omaim ao, anayabin kwa a not i boro'ika ririmin. Marasika kwa biya turin i bowabow kakafin sinaf isan kwaibasit kwaitin sisinaf. Imih boun i ef ta'imon nati na'atube kwanasinaf biya tutufin etei kwanab God ana bowabow isan kwanaya'asair, saise yawas gewasin isan ni'akir. ²⁰Bowabow kakafin isan kwabi'akir ana maramaim, yawas gewasin sinaf i ana ufunane kwama. ²¹Nati ana veyawar sawar iti boun kwasisinaf isan biya eo'ohow hai gewasin i abisa kwabai? Nati sawar hai yomanin i morob. ²²Baise boun kwa i bowabow kakafinane hirufami kwatit kwana God ana'akir wairafin kwamatar. Ana gewasin kwabaib i kwa ayawas tutufin etei nawiy kakafiyin matar, naatu nati sawar yomanin i ma'ama wanatowan. ²³Anayabin bowabow kakafin ana baiyan i morob, baise God ana siwar i ma'ama wanatowan Keriso Jesu wanawanamaim ema'am.

Tabin Ana Itinin

7 ¹Taitu, abisa isan anao i kwa kwaso'ob, anayabin kwa etei'imak ofafar i kwaso'ob. Ofafar i orot babin yawasin ema'am ana veyawar

¹ 6.11 2Cor 5.15; Gal 2.19 ² 6.12 Gen 4.7 ³ 6.13 Rom 12.1 ⁴ 6.14 1Jn 3.6 ⁵ 6.16 Jn 8.34; 2Pet 2.19 ⁶ 6.23 Rom 5.12, 15

i ebobonawiy. ²Itinin ta i boro iti na'atube kwana'itin, tautabin babin aawan yawasin ema'ama ana vey a ofafaramaim eo'o, nati babin i boro orot biyanamaim nafatum nama. Baise orot namomorob ufunamaim babin i tabin ana ofafarane hirufam. ³Isan imih babin aawan yawasin ema'am ana vey a i orot ta nabi'awan, nati babin i moser kwebayan. Baise orot emomorob ana vey a, nati babin i ofafarane tit. Naatu orot ta nabi'awan na'at i men moser kwebayan. ⁴Imih taitu tuwai'inah, ef ta'imon nati na'atube Keriso ana morobomaim baitumatumayah ofafar ana fairane rufamih hitit. Imih i ana misir maiye'emaim baita'ay boubun ana ef imatar, naatu boun morobone God biyawas maiye i nowan kwamatar, saise it bowayah gewasih na'atube God isan tanabow. ⁵Anayabin it taiyuwit biyat ana kok isan tanotanot ana vey a, ofafar run biyat ana kok kakafin kura'ara'ah naatu biyat tutufin etei bonawiy in morobomaim yai. ⁶aBaise boun, it nati ofafar fatumit tamorob ta'inu'in, God nati fatufatumane rufamit tatit. Anun Kakafiyin ana ef boubunamaim tabowabow, men ef atamanin ana ofafar hikirum inu'in tai'ufunun tabowabowamih. ⁷bImih ofafar i bowabow kakafin sinafuyan tanarouw tanao? En anababatun! Baise ofafar en na'at ayu au kakafih boro mi'itube ataso'ob. Anayabin ofafar men tama'am na'at ayu boro mi'itube bahiy isan hiofafar ataso'ob. ⁸Baise bowabow kakafin nati ofafaramaim ana ef tita'ur run ayu wanawana'umaim kura'ara'ah sawar kakafih asisinaf. Ofafar men tama'am na'at, bowabow kakafin i boro ana fair men tama. ⁹Marasika ayu ofafar men asoso'ob ana vey a ayu i yawasu ama, baise obaiyunen tur tit anonowar ana vey a bowabow kakafin yawas naatu ayu amorob. ¹⁰Obaiyunen tur nati yawas bai na hirouw hio atitita'ur i morob bai na. ¹¹cAnayabin bowabow kakafin, iti obaiyunen turamaim ana ef bai ayu ifuwu naatu easbunu. ¹²dIsan imih ofafar i kakafiyin, naatu obaiyunen tur i kakafiyin, mutufurin naatu gewasin. ¹³Imih iti sawar gewasin imaim sinaf ayu au morob bai na? En anababatun! Baise bowabow kakafin i ayu easbunu, isan imih bowabow kakafin taiyuwin ana yawas botait irerereb, sawar gewasin wanawanan wa'ir na ayu imurubu. Naatu nati obaiyunenamaim bowabow kakafin na kakafin, kakafin anababatun matar.

¹⁴It taso'ob ofafar i ayubit isan; baise ayu i orot maiyow, bowabow kakafin ana akir wairafinamih tubunu. ¹⁵eAbisa asisinaf hai yabih men asoso'ob, anayabin abisa sinafumih akokok i men asisinaf, baise abisa abifutuw i asisinaf. ¹⁶Naatu baise, abisa asisinaf i abisa men akokok i asisinaf nati i ayu abibasit ofafar i gewasin. ¹⁷Imih nati i men ayu asisinafumih, baise bowabow kakafin iti wanawana'umaim ema'am i

^a 7.4 Rom 6.2, 11 ^a 7.6 Rom 8.2; 6.4 ^b 7.7 Exo 20.17; Deu 5.21 ^c 7.11 Gen 3.13

^d 7.12 1Tim 1.8 ^e 7.15 Gal 5.17

esisinaf. ¹⁸ Ayu so'ob wanawana'umaim i men gewasin ta ema'am, nati i ayu biyau naniyan kakafin. Anayabin ayu au kok gagamin i mi'itube gewasin ata sinaf, baise sinaf isan men karam boro anasinaf. ¹⁹ Anayabin abisa gewasin sinafumih anotanot i men asisinafumih. Baise kakafih men akokok sinaf nati i ama asisinaf. ²⁰ Naatu ayu sawar abisa men akokok i asisinaf, nati i men ayu asisinaf, baise bowabow kakafin wanawana'umaim ema'am i esisinaf.

²¹ Isan imih iti ofafar ana ef mi'itube ebowabow i atita'ur. Ayu bowabow gewasin sinafumih anotanot ana vey, bowabow kakafin i mar etei etitit. ²² Ayu wanawanau i ebiyasisir gagamin maiyow God ana ofafar isan. ²³ Baise ayu biyau wanawanan efan tata'ane ofafar ta ayu au not ana ofafar hairi hibiyou atatam. Nati baiyowamaim iwa'an ayu buwu bowabow kakafin ana ofafar wanawan dibur yariyu. ²⁴ Ayu i yababan orot! Yait boro iti biyau murubinane niyawas nabotait. ²⁵ God ana merar ayiy Jesu Keriso'one ayu boro niyawasu. Imih ayu au not i boro God ana ofafar isan ni'akir nabow, baise ayu biyau i bowabow kakafin ana ofafar isan ni'akir nabow.

Yawas Anun Kakafiyin Wanawananamaim

8 ¹ Isanimih boun sabuw iyabowat Keriso Jesu wanawananamaim hikofan tema'am boro men hinakusairihimih. ² Anayabin God Anunin ana fairamaim Keriso Jesu wanawananamaim yawas ebitit, i ayu bowabow kakafin ana fairane naatu morob ana fairane rufamu atit. ³ Ofafar men karam tasinaf, anayabin it biyat ana kakafinamaim iwa'an ofafar ririm. Baise God sinaf, taiyuwin Natun Ta'imon iyun ra'iy orot biyan kakafin bai iyaun, naatu bowabow kakafin ana siboromih matar. Naatu bowabow kakafih orot babin wanawanahimaim etei kusaisiren. ⁴ God iti bowabow sinaf, saise ofafar ana tur eo'o i hinan wanawanatamaim hinamatar, men biyat ana kokomaim tanama, baise Ayubin ana kokomaim tanama. ⁵ Sabuw iyab biyah ana naniyanamaim tema'am hai naniyan tutufin etei i nati'imaim ebobonawiyih. Baise sabuw iyab Anun Kakafiyin ana kokomaim tema'am, hai not tutufin etei Anun ana kokomaim tesisinaf. ⁶ Turobe orot babin ana notamaim nabobonawiyi boro morob wan inayen. Baise Anun Kakafiyin ana notamaim nabobonawiy boro yawas naatu tufuw inab. ⁷ Anayabin sabuw iyab biyah ana kokomaim kakafih ebobonawiyih i God ana kamabiy temamatar, naatu men karam boro God ana ofafar babanamaim hinama. ⁸ Sabuw iyab biyah ana kokomaim ebobonawiyih men karam hiwa'an God niyasisir.

^f 7.23 Gal 5.17; 1Pet 2.11 ^g 7.25 1Cor 15.57 ^h 8.4 Gal 5.16, 25

⁹ⁱBaise kwa i men biya ana kokomaim ebobonawiyi, baise Anun Kakafiyin. Anayabin God Anunin i kwa wanawanamaim ema'am. Orot yait Keriso Anunin men wanawanamaim ema'ama, i men Keriso nowan. ¹⁰^jBaise Keriso kwa wanawanamaim ema'am, imih God buwi yawas kwama'am. Basit biya i boro namorob anayabin bowabow kakafin awan karatan, baise ayub i yawasin anayabin ayub ana yawas i mutufurin. ¹¹Naatu God Anunin Jesu morobone biyawas kwa wanawanamaim ema'ama. Keriso morobone biyawas na'atube kwa auman boro i Anunin kwa wanawan ema'am imaim biya yawas nitin.

¹²Isanimih, taituwou, it i bowabow hitit, baise men biyat ana kokomaim tanasinafumih. ¹³^kAnayabin kwa biya ana kokomaim kwanama'am na'at boro kwanamorob. Baise Anun Kakafiyin ana kokomaim kwanama'am na'at, biya ana kokok kakafih etei boro nimuruben. Naatu kwa boro yawas kwanama, ¹⁴anayabin sabuw iyab God Ayubin ebobonawiyih i God natunatun. ¹⁵^l^mAnayabin God Ayubin kwabaib i men kwa niwa'ani bir ana fairamaim nabonawiy isan kwani'akiramih. Baise Ayubin kwabaib i natunatun anababatun matar isan kwabai, saise imaim fair tanab isan tanarerey tanao, "Abba! Tamaiya!" ¹⁶ⁿI Ayubin it ayubit bairi hita'imon teo'oreb it i God natunatun. ¹⁷It i natunatun imih sawar abisa i ana sabuw isah ebobotan boro bairi tanab yaun. Naatu abisa God Keriso isan ebobotan boro bairi tanab yaun. Keriso ana biyababan bairi tanafafaram na'at ana marakaw boro bairi tanafaram.

¹⁸Anababatun au'uwi, biyababan iti boun tabai tabi'akir, mar boro ana marakaw nabirerereb hairi tanafufufun, nati marakaw i ra'at kwanekwan men biyababan hairi ta'imon. ¹⁹Anayabin baimataren sawar tutufin etei God natunatun bow tit bairerereb isan, yah kusikus iwa'an hima hi'uroron tinuwanuw. ²⁰^oOrot ta'imon ana kakafinamaim baimataren sawar tutufin etei higabiyoy, men i akisih hai kokomaim baise God ana kokomaim sinaf. ²¹Iti baimataren sawar etei vey a ta hai bai'akirane hibat timunumun boro hinabotaitih hinatit God natunatun bairi marakaw gewasin hinafaram.

²²It taso'ob baimataren sawar tutufin kek tufuwamih ebotukwar ana biyababan tebaib na'atube, aneika hima hitef hirererey tana boun tatit. ²³^pMen baimataren sawar akisin hima hitef tererereyamih, baise it auman wanawanatamaim hamenamo erererey auman tama takakaif, God nan ni'obaiyit it i natunatun. ²⁴Anayabin it nuhifotamaim iyawasit. Abisa isan nuhit fot tama'am i tabaika, aisim boro ibanak sawar tabo isan

ⁱ **8.9** 1Cor 3.16; 12.3 ^j **8.10** Gal 2.20 ^k **8.13** Gal 6.8; Col 3.5 ^l **8.15** Mak 14.36; 2Tim 1.7 ^m **8.15-17** Gal 4.5-7; Rev 21.7 ⁿ **8.16** 2Cor 1.22 ^o **8.20** Gen 3.17-19 ^p **8.23** 2Cor 5.2-4

nuhit nafot tanama tanakaif. ²⁵Baise sawar abisa men tai'itin nuhit nafot tanama tanakakaif na'at, it boro yatet nanub tanama tanakaif.

²⁶Ef nati ta'imon it ata ririm ana vey a Ayubin ena it baibais ebitit. Anayabin it mi'itube o yoyoban isan ana ef men taso'ob. Baise i Ayubin it isat tef rerey eyoyoyoban wainit, turamaim men karam boro tanao. ²⁷Naatu God dogorot nutitiy i'itin, Ayubin ananot i so'ob, anayabin Ayubin God ana sabuw isah eyoyoyoban i God ana kokomaim esisinaf.

²⁸Naatu taso'ob, sawar etei God esisinaf i gewasih sabuw iyab tibiyabuw isah, sabuw iyab i ana kokomaim ea'afih isah. ²⁹Sabuw iyab God erurubinih i so'obabo erurubinih. I akisin yasairih hina i Natun ana'itinabe himatar, saise i Natun i baitumatumayah etei tuwah hai ain na'atube. ³⁰Naatu iyab yayasairih i eafih, naatu iyab ea'afih i yamutufurih, naatu iyab yayamutufurih i ana marakaw bairi faram isan buwih.

³¹Sawar iti sisinaf isan boro mi'itube tanao? God it isat nabatabat na'at yait boro nagam na'uwit? En anababatun. ³²God taiyuwin Natun men eoharihar, baise it etei siwarit, Natun ta'imonam ata siwar yai. Imih kwanotanot sawar afa'am boro asire baitita'e nama?^u ³³God taiyuwin ana roubinen sabuw gewasih rouw bowabow yait boro baifuwenamaim nagam na'uwih? En anababatun! ³⁴Yait boro God ana sabuw ubar nitih nagam na'uwih? En anababatun! Jesu Keriso akisinamo morob, naatu morobone misir maiye Tamah ana asukwafune mare isat ma eyoyoyoban. ³⁵Imih yait boro Keriso ana yabowane nakusibit, yare men karam nakusibit, o yawas fokarih, roukoukuwen, baimar kakafin, sawar en, obiruwen, o morob? ³⁶Buk Atamaninamaim eo na'atube,

“O wabimaim aki i mar etei morob wanawana'imaim ema'am, ai'itinin i *sheep* bunibunin afuwinamih tebai tenan na'atube.”

³⁷En baise, Keriso aki biyabuwi i wanawanamaim sawar etei hai fair aki aisNewaten. ³⁸Imih ayu aso'ob anababatun men karam boro sawar ta imaim Keriso ana yabowane nakusibitamih, men morob, men yawas, men tounamatar, men Demon, men mar iti boun, men mar boro enan, men fair ³⁹men yate mar, men me baban, men sawar ta himamatar wanawanahimaim boro God ana yabow ata Regah Jesu Keriso wanawanamaim ema'am nakusibit tanatitamih, en anababatun.

9 ¹Ayu i Keriso wabinamaim tur anababatun ao, men abifufuwenamih. Anayabin dogorou naniyan atatam Anun Kakafiyin ebibasit ayu abisa ao. ²Ayu dogorou wanawanan yababan awan karatan, naatu baiyufarir isan abiwa'an men ekakaram. ³Anayabin ayu au sabuw, biyau finimu turin naatu au rara anababatun, i wabihimaim

^q 8.27 Psa 139.1 ^r 8.28 Eph 1.11 ^s 8.29 Col 1.18; Heb 1.6 ^t 8.31 Psa 118.6 ^u 8.32 en baise boro nitit. ^v 8.33 Isa 50.8-9 ^w 8.36 Psa 44.22 ^x 9.3 Exo 32.32

mi'itube God tao rarafu. Naatu Keriso'one hita'afuru'umu atatit nabin, ⁴ysaise Israel sabuw yawas hitab, God natunatumamih hitamatar: ana marakaw, ana obaibasit, ana obaiyunen tur hitab, kwafiren anababatun, naatu ana omatanen isah tirerereb. ⁵Nati sabuw hai a'agir kwafe'en i Hebrew big ana kik owe'owen, imaim gin tanay boro tanan Keriso ana tufuw ana'an tanatit. God akisinamo sawar etei ana bonawiyenayan tanabora'ara'ah wanatowan wanatowan. *Amen.*

⁶Baise God ana omatanen i men ta bai fuwenamih, mar etei i yabih temamatar. Iti ao anayabin Israel sabuw etei hai tufuw ana'an i Israelane hitufuw, baise etei'imak boro men hinan Israel sabuw hinamataramih. ⁷Na'atube Abraham ana rara'ane hitutufuw men etei Abraham natunatumamih. Bukamaim God iti na'atube eo hikirum inu'in kwaso'ob. "O natu Isaac ana rara'ane iti omatanen abit boro i hinab." ⁸Tur iti na'atube ana kubuna kwananowar, God natunatumamih i men Abraham ana rara'amaim hitutufuw akisih ebowabowamih. Baise sabuw iyab omatanenane hitutufuw God natunatumamih i nati sabuw. ⁹Anayabin God Abraham iti na'atube eomatan, Veya ayai'ya'imaim boro ana matabir naatu Sarah boro nataub kek orot nayai.

¹⁰Men nati akisin baise kwana'itin, Rebecca auman toub kek kikif ya, tamah ta'imon ata'agir Isaac. ¹¹Anakubuna gewas kwananowar, kek kikif wanawanahimaim kek ta bai ana kok abisa yayakitifuw isan, naatu Rebecca iu, "Kek ain boro tain isan nabow." Kek i men hitufuw, ¹²naatu men sawar ta gewasin o kakafin hisinafumih, baise i ana yayakitifuwen tafanamaim bat ta rubin. Men i hai bowabowamaim ta rubinimih, en. ¹³Bukamaim hikirum inu'in kwaso'ob, "Jacob i ayu abiyabuw, baise Esau i ayu abifa'ifai."

¹⁴God isan boro mi'itube tanao? I bowabow kakafin orot? Aiyabin anababatun! ¹⁵Anayabin Moses isan eo, "Ayu orot babin yait ta anarurubin i boro anakabibir." ¹⁶Isan imih sawar etei i men it sabuw takokok o tabowabowamaim emamatar, baise sabuw iyab God ana kokomaim ekakabibirih. ¹⁷Anayabin Buk Atamaninamaim hikirum inu'in, Moses Egypt hai aiwob orot isan eo, "Anayabin iti isan ayu abora'ahi efan yatetoro'ot ayara'ahi. Saise ayu au fair wanawanamaim anayai nabow naatu ayu wabu nara'at tafaram tutufin etei hinanowar." ¹⁸Isan imih, God ebiyasisir sabuw iyab baibais tekokok boro nibaisih, baise sabuw iyab dogoroh efokar boro niwa'an hinafokar.

^y 9.4 Exo 4.22; Lev 1-10; Psa 147.19; Rom 15.8; Heb 9.5 ^z 9.7 Gen 21.12 ^a 9.8 Gal 4.23

^b 9.9 Gen 18.14 ^c 9.12 Gen 25.23 ^d 9.13 Mal 1.2-3 ^e 9.15 Exo 33.19 ^f 9.16 Eph 2.8

^g 9.17 Exo 9.16

God Ana Ya So'ar Naatu Ana Kabeber

¹⁹Kwa orot ta ayu isau boro iti na'atube inao, "Aisimamih God aki ebi'ubari? Yait boro ana kok nakwahir?" ²⁰^hO i yait, orot maiyow aisim God awan kuyayafutifut? Noukwat men karam boro ana bu'urayan isan nao, 'Aisim iti na'atube ibu'uru?' ²¹ⁱOrot noukwat bu'irayan i akisin ana kokomaim me ta'imonamaim noukwat boro rou'ab nabu'ir, ta hiyuw ana noukwat, ta vey a maiyow baitab isan ana noukwat.

²²God ana yaso'ar i kok kwanekwan boro sabuw ti'obaiyih. Iyab hisisinaf kakaf isan tagurusih, saise ana fair imaim hita'itin, baise nati efanin i yatenub wainab bairi hima. ²³Iti na'atube sinaf, saise i ana marakaw bonamanamarin ti'obaiyit tata'itin naatu ana sabuw iyab kabibirih bairi ana marakaw faram isan rurubinih auman tataso'ob. ²⁴Anayabin it sabuw i God ea'afit, men Jew sabuw akisih, baise Ufun Sabuw auman ea'afih. ²⁵^jGod ana tur iti na'atube eo Hosea ana Bukamaim kirum.

"Sabuw iyab men ayu au sabuw, boro isah ana'af anao,
'Ayu au sabuw,' naatu ayu boro anao, Ayu au sabuw abiyabow, nati sabuw men abiyabow."

²⁶Nati efamaim God eo, "Kwa i men ayu au sabuw." Baise i boro nao,
"Kwa i God ma'ama wanatowanin natunatun."

²⁷^kIsaiah Israel sabuw isah tur rererebamaim eo, "Kwa Israel sabuw i tor ana dones na'atube, God boro matan ta'amo niyawasih. ²⁸Anayabin, Regah i saise'ewat esisinaf sabuw tafaramamaim tema'am etei boro marta'imon baimakiy nitih nasawar." ²⁹^lMarasika iti tur Isaiah eo, "Regah Fairin men agir hai durun ta ebihamiy i, it boro tatan bar merar Sodom naatu Gomorah hairi bi'afiyih na'atube ti'afiyit."

Paul Ana Yoyoban Israel Isah

³⁰Tur yomanin boro iti na'atube tanao, Ufun Sabuw i men ofafar hinuwih hibai imaim God hai ef mutufurin rouw eorerebamih, baise abisa Keriso isah sisinaf hitumatum imih God hai ef mutufurin rouw eorereb." ³¹Baise Israel sabuw ofafar hinuwih hinotanot hai ef i mutufur hirouw hio, baise en, anayabin i ofafar eo'omaim hisisinaf. ³²^mAna'an aisim? Ana'an i men baitumatumamaim hibat, baise abisa i hisisinafumaim hibat. Imih a rousukusukunen ana kabayamaim ah rusukun hire. ³³ⁿBukamaim hikikirum na'atube,

"Kwa'itin ayu i Zion ana kabay sabuw ah erurusukusukun tafanamaim abatabat,

^h 9.20 Isa 29.16; 45.9 ⁱ 9.21 Jer 18.6 ^j 9.25 Hos 2.23 ^k 9.27-28 Isa 10.22-23

^l 9.29 Isa 1.9 ^m 9.32 Isa 8.14 ⁿ 9.33 Isa 28.16; 1Pet 2.6

to nati sabuw ah erusukun tere'er.

Yait i nabitumitum boro men aurin biya'ohow nama."

10 ¹Taituwau ayu dogorou wanawanan au kok gagamin naatu au yoyoban i mi'itube ayu au sabuw Israel yawas hitab!

²Anababatun a tur ao'owen Israel sabuw etei i God isan tibibobowen, baise i hai bobowen i men so'ob anababatun tafanamaim tebatatab.

³Anayabin ef mutufurin Godane enan i men hiso'ob, imih i taiyuwih hai ef tibimataren, naatu God ana ef mutufurin i bitih babanamaim men tema'am. ⁴Anayabin ofafar ana tur etei Keriso sinaf in yomanin isawar, saise sabuw iyab tibitumatum etei hinan hai ef namutufor.

Yawas Sabuw Etei Isah

⁵°Moses ofafaramaim baimutufurit isan iti na'atube kubuna eo, "Orot yait Regah ana tur ebi'ufunun i boro nama." ⁶°Baise ef mutufurin, baitumatum tafanamaim bat enan i iti na'atube eo, "Men dogoromaim kwanao, 'Yait boro au mar nayen, Keriso nab nare?' ⁷O yait boro inare me baban Keriso morobone inab inayen?" ⁸Baise tur abisa ao i iti, God ana tur i wanawanamaim, awamaim, dogoromaim, baitumatum turaban nati i boun aki ao'oreb. ⁹Naatu awamaim ina'e'en Jesu i Regah naatu dogoromaim initumitum i morobone God iyawas maiye, o boro niyawasi. ¹⁰Anayabin o dogoromaim kubitumatum isan a ef boro namutufor, naatu awamaim kue'e'en isan boro yawas inab.

¹¹°Bukamaim itit na'atube eo, "Orot yait i ebitumitum boro men biyan na'ohow." ¹²°God matanamaim Jew naatu Ufun Sabuw i ta'imon men tata'amih, nati Regah ta'imon etei hai Regah. Iyab isan te'afa'af boro ana toto ana buyoy tutufin etei nigegewasinih. ¹³°Anayabin, "Sabuw iyab Regah isan te'afa'af boro niyawasih." ¹⁴Bo i men hinabitumitum boro mi'itube isan hina'af? Naatu tur men nan hinanonowar boro mi'itube hinitumatum? Naatu binanuyah men hinan hinabibinan boro mi'itube tur hinanowar?

¹⁵°Naatu tur binanuyah men hiniyafarih hinatitit, tur boro yait nabinan? Bukamaim hikikirum na'atube, "Binanuyah God ana tur gewasin hibai hitit me hiwawastubun ana itinin i gewasin maiyow!"

¹⁶°Baise Israel sabuw turihawat tur gewasin hinowar naatu hitumatum. Anayabin Isaiah iti na'atube eo, "Regah yait boro aki abibinan nanowar?" ¹⁷Isan imih, baitumatum i tur tanonowar imaim emamatar, naatu tur abisa tanonowar i Keriso ana turane enan. ¹⁸°Baise ayu abibat, nati sabuw tur men hinowar? En sabuw i tur hinowar" Fanah tit kamar tutufin etei bai, naatu hai tur i tit tafaram ana yomanin etei hinowar.

° 10.5 Lev 18.5 ° 10.6-9 Deu 30.12-14 ° 10.11 Isa 28.16 ° 10.12 Act 15.9 ° 10.13 Jol 2.32 ° 10.15 Isa 52.7 ° 10.16 Isa 53.1 ° 10.18 Psa 19.4

¹⁹W^wIban abibat maiye, Israel sabuw tur men naniyan hibai? Tur hinowar naatu Moses wantoro'ot eo,

“Ayu boro sabuw afa anibaisih, au sabuw hinibobowen,

Naatu Ufun Sabuw afa anigegewasinih,

au sabuw yah naso'ar. ²⁰x^xNaatu Isaiah itafofor eo, “Sabuw iyab

ayu men tenunuwuhu, i ayu hitita'uru; sabuw iyab ayu isou men hifefeyan i isah airerereb.” ²¹y^yBaise Israel sabuw isah iti na'atube

eo, “Mar manin maiyow ayu sabuw baifanasairayah naatu dogoroh fokarin isah umou abora'ah abat ao kwana kwai'ufnunu.”

God Ana Kabeber Israel Isan

11 ¹z^zAyu kwa abibatiyi: Kwanotanot Israel sabuw God kwahirih? Aiyabin! Ayu i Israel orot, Abraham ana rara'ane atufuw naatu au durun i Benjamin. ²God ana sabuw marasika nowanamih rurubinih men kwahirihimih. Buk wanawanan efan ta'amaim Elijah Israel sabuw isah gam God iu kwanotanot? ³a^a“Regah ifefeyan eo, “Regah a dinab orot etei hirouw himorob sawar, naatu a sibor hai gemogem i etei hikwayam hihururuw hire, ayu akisu'umo kutatabuw ama'am. Naatu boun i tesisinaftobon ayu hinarabu ana morobomih.” ⁴b^bBaise God Elijah iya'afut eo, “Ayu au bai'ufununayah sabuw etei *seven thousand* iyab *Baal* men hikwakwafir i tema'am.” ⁵Ef i nati ta'imon boun emamatar. Sabuw matanta'amo iyab God ana manaw ana kabeberamaim rurubinih i tema'am. ⁶I ana roubinen i manaw kabeber tapanamaim bat esisinaf. Men sabuw hai bowabowamaim. Anayabin God ana roubinen sabuw hai bowabowamaim na'itin narurubinih na'at, nati manaw kabeber i yabin en.

⁷Ana itinin nati isan, Israel sabuw abisa isan hinot hinunuwet men hitita'urimih, baise sabuw matan ta God rurubinihiwat hinunuwih hitita'ur. Sabuw turin God ea'afih tainih gogor naatu dogoroh fokar.

⁸c^cBuk Atamaninamaim eo na'atube,

“God nuhih ibur dogoroh iwa'an fokar,

imih boun ana veyah hinanuw men hina'itin, hinanowar men naniyan hinab.

⁹d^dNaatu David eo na'atube,

“Kwihamiyih hai hiyuw banimih ematar,

naatu warasa na'atube ebuwih tere

saise baimakiy hinab

¹⁰Matah kubofafar, saise men hinanuw,

^w **10.19** Deu 32.21 ^x **10.20** Isa 65.1 ^y **10.21** Isa 65.2 ^z **11.1** 1Sa 12.22; Psa 94.14; Php 3.5 ^a **11.3** 1Ki 19.10, 14 ^b **11.4** 1Ki 19.18 ^c **11.8** Deu 29.4; Isa 29.10 ^d **11.9-10** Psa 69.22-23

mar etei bit kwitih tun erabih teso'ob."

¹¹Abibatiy maiye. Israel sabuw ah rusukun hire'er boro na'atuka hina'in? En anababatun! Baise boro hinamisir maiye. Anayabin i hai ra'iyemaim ef botawiy yawas gewasin na Ufun Sabuw hibai, isan imih Israel sabuw isah tibibobowen. ¹²Jew sabuw hai kakafihimaim baigegewasin gagamin tit tafaram etei ebaib. Naatu i ayubih ana kasiyomaim Ufun Sabuw baigegewasin gagamin na'in suware tebaib. Imih Israel sabuw mounurih na'in hinarur ana vey a baigegewasin i boro gagamin na'in hinab.

¹³Boun i kwa Ufun Sabuw isa ao. Ayu iti na'atube kwa Ufun Sabuw a tur abarayan ana ma'am, ayu iti bowabow wanawanamaim boro anasinaftobon anabow gewas. ¹⁴Saise imaim anotanot au sabuw Jew hita'it ra'ahu hinanugigir ibo hinan yawas hinab. ¹⁵Anayabin Jew sabuw kouh God hibitinimaim, tafaram wanawanan sabuw God ana rakit hima'am botabirih hina bairi hitounuw. Imih God sabuw bairi tibitounuw ana vey a, ana itinin i sabuw murumurubih bow na yawas ebitih maiye na'atube.

¹⁶Rafiy kafuf imasib reban sibor kuyayara'ah, kafuf tutufin etei i kakafiyin matar, naatu ai wairoron turin God ana sibor inabitin na'at, famefamen auman i nowan himatar. ¹⁷Kwa Ufun Sabuw a'itinin i kutor *olive* famefamen na'atube. Baise hi'afuw umatanum *olive* famenamaim hituwituw hikuboubunih hiyen, imih boun kwa i Jew sabuw hai yasisir turin kwabai kwabiyasisir. ¹⁸Isan imih sabuw nati ai famehibe hi'afuw hire'ere men kwananuw furuwih kwani'o'orotomih. Anayabin kwa i ai famefamen, naatu ai famen ana fair i ai anane ana fair ebaib.

¹⁹Kwa boro iti na'atube kwanao, "Ai famen hi'afuw hisaroun, imih ayu boro i ana efanin anab hinitutuwu." ²⁰Nati i turobe. Nati sabuw ai famehibe hi'afuw hibisaroun, anayabin men hitumatum, kwa i kwaitumatum imih kwana hai efan kwabai. Baise nati isan men kwanio'oro'ot. ²¹Anayabin Jew sabuw i ai famen anababatun men yawananih, baise e'afuw isaroun, imih kwa auman boro men nayawanan nihamiy kwanama'amih.

²²Imih God ana kabeber naatu ana yaso'ar hairi kwana'itin. Sabuw iyab kakafin sinafuyah God nati sabuw isah i yan esoso'ar, baise kwa isa i ekakabeber. Naatu i ana kabeberamaim kwanama'am na'at i mar etei ana gewasin kwanama. Baise men imaim kwanama'am kwa i boro na'afuw nabosairi kwanatit. ²³Sabuw nati hinamatabir maiye hinabusuruf God hinabitumitum, boro nabow

° 11.11 Act 13.46 ° 11.17 Eph 2.11-19 § 11.22 Jn 15.2, 4

hai efanamaim naya. Anayabin God ana fair ema'am karam boro nasinaf. ²⁴Kwa Ufun Sabuw, kwa i kaiyar *olive* famen na'atube kwama'am hi'afuw kwana umatanum *olive* famenamih hitutuwi. Naatu Jew sabuw i umatanum *olive* na'atube. Isan imih God karam ai famefamen anababatun hitagagagir ti'inu'in boro nabow nitutuwen maiye.

²⁵Ayu akokok iti tur ana kirikirifot i kwanaso'ob gewas, saise men kwa akis not wairafih kwanarouw kwana'omih. Israel sabuw afa dogoroh i fokar, imih boro nati na'atube hinama nanan Ufun Sabuw runamih hio ana fofonin hinan hinarun. ²⁶^hEf iti na'atube namatar saise Israel sabuw etei boro niyawasih, Buk Atamaninamaim iti na'atube eo.

"Baiyawasenayan boro Zion ine nan,
Jacob wawawan bowabow kakafih tisisinaf nabosairen."

²⁷ ⁱ"Naatu

hai bowabow kakafih ana bobosairen
ufunamaim au obaibasit boro anitih."

²⁸Israel sabuw hina God ana rakit na'atube himatar, saise Tur Gewasin kwa Ufun Sabuw isa tan. Baise Israel i God ana rourubinen sabuw, imih God ebiyabuwih anayabin uwahinah oro'orot wabih gagamin. ²⁹God men kafa'imo siwar bitih umahimaim bosair naatu ana sabuw rurubinih isah nuhin burumih. ³⁰Baise kwa Ufun Sabuw marasika God fanan kwasair, baise boun ana kabeber i'obaiyi kwa'i'itin, anayabin Israel sabuw fanan hisair. ³¹Naatu ef i ta'imon, kabeber nati kwakwabaib i boun Jews sabuw auman God i'obaiyih ti'i'itin. ³²Anayabin sabuw etei hibifanasair isan God ibasit hifanasair, saise hai fanasairane etei'imak takabibirih.

God Ana Merarayow

³³/Yowe! abifofofor men kafaita,
yait boro God ana toto ana buyoy, ana not naatu ana so'ob isan
nafun nibabatiy,
yait boro i abisa esisinaf isan nanuwih nibabatiy?

³⁴^kO yait Regah ana not iso'ob?
O yait boro Regah ana binan inao ini'obaiy?

³⁵^lO yait God a sawar itin,
saise God boro wan nay obo nit?

³⁶^mAnayabin sawar tutufin etei hai an i God,
etei i wanawanamaim, naatu etei i nowan.
Imih kwafiren, bora'ara'aten etei i tanitin wanatowan, wanatowan.
Amen.

^h 11.26 Isa 59.20-21 ⁱ 11.27 Jer 31.33-34 ^j 11.33 Isa 55.8-9 ^k 11.34 Isa 40.13; 1Cor 2.16 ^l 11.35 Job 41.11 ^m 11.36 1Cor 8.6

Yawas Boubun Keriso'omaim

12 ¹ⁿIsan imih taituwau, God ana kabeber ai'titin i ra'at kwanekwan, imih abifefeyani, kwa biya yawasin i kwanaya'asair God ana siboromih kwanitin. Nati sibor i kakafiyin naatu God ana yasisir, anayabin nati i ayubit ana kwafiren ef anababatun. ²Men tafaram ana yawasamaim nabonawiyi, baise God kwanifefeyan a not tutufin etei nabotabir niboubun. Imaibo kwa i karam God ana kok abisa boro kwanafufun gewas, i ana gewasin, ana yasisir naatu ana kok uhewbitan boro kwanaso'ob.

^{3o}Manaw kabeber God ayu bitu imaim kwa au'uwi. Men taiyuw a notamaim nabora'ahi me'at, baise a not narumutufur gewas kwa a baitumatum God bit anafonin imaim kwanabatkikin. ^{4p}Biyat i sawar maumurih na'in baina ikokofan wowab biyat matar. Naatu biyat wanawanan ana wowab ta ta i bowabow ta ta tebowabow. ⁵It i moumurit na'in, baise Keriso'one it etei tana biyat ta'imon matar. Naatu ta'ita'imon ikokofanit tana biyat ta'imon tutufin matar. ^{6v}Isan imih manaw kabeberamaim ata siwar ta ta tabow. O ta a siwar God ana tur orereb isan na'at, a baitumatum ana fofoninamaim inabat inaorerereb. ⁷God ana bowabow isan nabit na'at inabow, bai'obaiyen isan na'at ini'obaibiyen. ⁸Koufair na'at, sabuw koufair nitih, bosemorayan na'at, ereyasisir nabosemor, bonawiyenayan na'at, na'abar totofar sabuw nabonawiyih, kabeberayan na'at, erekawasa isah nasinaf.

⁹Yabow i turobe'emaim iniyabow, abistan kakafih inarukouw, naatu abisa gewasih inabukikin. ^{10v}Kirisiyan ana yabowamaim taituwa isah iniyabow, naatu taituwa bairi nena kwanikakafbonen. ¹¹Sunanub kwanabow men kwananokow, Regah isan dogor tutufin etei yoyobanamaim kwanabow. ^{12s}Ereyasisir nuhi nafot kwanama, bai'akir ana vey yatenanub naatu mar etei kwanisnubanub kwanayoyoban. ^{13t}Kirisiyan sabuw iyab tibi'akir kwanibaisih, naatu a etawan kwanabotawiy nanawan sabuw isah.

^{14u}Sabuw iyab hirab tibia'akiri, God kwanifefeyan nigegewasinih, men nararafihimih ¹⁵Sabuw iyab tibiyasisir bairi kwaniyasisir, naatu sabuw iyab tibiyababan bairi kwaniyababan. ^{16v}Kou'ayomaim a not etei ta'imon taituwa kwananuhih bairi kwanibit abar kwanama. Men kwa akis notanotayah kwanarouw kwanaora'ara'at taituwa kwanitaiyih. Baise taiyuw kwanayariyi bairi anafonin kwanaremor, men o akis not wairafi inarouw inao.

ⁿ 12.1 Rom 6.11, 13; 1Pet 2.5 ^o 12.3 1Cor 12.11; Eph 4.7; Php 2.3 ^p 12.4-5 1Cor 12.12, 27 ^q 12.6-8 1Cor 12.4-11; 1Pet 4.10-11 ^r 12.10 1Pet 1.22 ^s 12.12 1Th 5.16-18
^t 12.13 Heb 13.2 ^u 12.14 Mat 5.44; 1Cor 4.12 ^v 12.16 Pro 3.7

^{17w}Sabuw o isa kakafin hinasisinaf, men wan inay kakafin isah inasinafumih. Baise yate nanub abisa gewasin sabuw etei matahimaim inasinaf. ¹⁸Asinafumaim sawar etei gewasih inasinaf, saise sabuw bairi tufuwamaim kwanama. ^{19x}Men kafa'imo isa kakafin hinasisinaf isan sa bowamih inanot, baise nati efan inihamiy God ana yaso'ar boro i sa nabow. Anayabin Buk Atamaninamaim iti hikirum, "Ayu boro wan anay, Regah iti na'atube eorereb." ^{20y}Naatu Bukamaim iban eo maiye, "A rakit orot bayumih namomorob na'at inituw, harewamih sikan namamamah na'at, harew initin natom, iti na'atube inasisinaf a rakit orot dogoron wanawanan boro biya'ohow na'arah auman naremor. ²¹ Kakafin men nawasbunimih, baise gewasin inasinaf imaim kakafin inawasabun."

A Ukwarih Kwanakakafiyih

13 ^{1z}Kwa etei a aiwob^a kwanakakafiyih, anayabin roubabaruwen ana fair etei i Godane na orot bai. Naatu iti aiwob ana fair etei i God taiyuwin imatar. ²Isan imih o yait aiwob orot kukwakwahir, o i God abisa bimatar kukwakwahir. Naatu sabuw iyab nati na'atube tisisinaf i taiyuwih babah teo'o. ^{3b}Anayabin sabuw iyab gewasin tisisinaf bonawiyenayah isah boro men hinabir, baise kakafih sinafuyah boro hinabir. ⁴Anayabin orot ukwarih i God ana'akir wairafih, kwa ama gewas isan tebowabow. Baise kakafin kwanasisinaf na'at i kwanabir, anayabin orot ukwarin sabuw baimakiyih isan ana fair God bitin i ema'am boro baimakiy nitih. ⁵Isan imih, a orot ukwarih i kwanakakafiyih, anayabin nati kwasisinaf ebi'obaiyi i sawar gewasin, men baimakiy akisin isan kwanabir kwanakakafamih. ^{6c}Ana'an nati isan kwa kabay kwaya'aya, anayabin God ana bai'akirayah i faimar iti sawar isah tebowabow. ⁷Orot babin hai bit abisa biya ema'am kwanitih abit kwanikisisir, kabay ana bit kabay kwanayai, tura ana sawar biyamaim ana bit kua'abar wan inay maiye, isa tekakaf ibo isah inakakaf, tirurusagiya ibo inarusagiya.

Taituwa Hai Bit Kwana'abar

^{8d}A bit sabuw biyahimaim tema'am etei kwanibaiyan nasawar, men kwanihamiyen hinama'amih. Bit ta'imon biyamaim nama'am i yabow akisin, taituwa bairi kwaniyabowbonen kwanama, anayabin orot yait taituwan ebiyabow i ofafar eo na'atube sinaf yabin emamatar. ^{9e}Ofafar

^w 12.17 1Th 5.15 ^x 12.19 Deu 32.35; Mat 5.39 ^y 12.20 Pro 25.21-22; Mat 5.44

^z 13.1 Pro 8.15; Tit 3.1 ^a 13.1 orot ukwarih ^b 13.3 1Pet 2.13-14 ^c 13.6-7 Mat 22.21

^d 13.8 Mat 22.39-40; Jas 2.8 ^e 13.9 Exo 20.13-15, 17; Deu 5.17-19, 21

i iti, “Turanah a’aawah men ufuh inan, sabuw men ina’asbunubuw, men inabain, men inabahiy, naatu ofafar afa iti na’atube etei i iti ofafar suma’ay, taituwa iniyabuwih o taiyuw kubiyabuw na’atube. ¹⁰/Yabow taintuwan men ebiyababan. Isan imih yabow i abisa ofafar eo na’atube i sinaf yabih temamatar. ¹¹§Naatu sinaf iti kwanasinaf, abisa iti boun ana vey a temamatar i kwanaso’ob. In ana vey a i sawar, anayabin it yawas bain isan ana vey a i na kabom, men marasika tabitumatum na’atube. ¹²hGugumin i kafa’imo nasawar, mar i boro’omo natoririb. Isan imih gugumin ana bowabow i tanihamiyen, naatu tanamisir marakawamaim ma isan taniyow. ¹³iBowabow gewasin mar ana efamaim tanasinaf, men aatom, gamin, harew tom baikoko’aw, baiwa’an kwanekwan, baiyow, naatu baibobowen. ¹⁴/Baise Jesu Keriso kwanab a faifuwamih kwaniyoun, saise boro men biya ana kok susuwin isan ana ef kwananuwetamih.

Sabuw Fairih Naatu Ririmih

14 ¹kYait ana baitumatum erara’iy ana merar kwanay kwanab a kou’ayamaim narun, baise men i ana kakafin isan bairi kwanagam kwanibabatiy. ²lSabuw afa tebitumatum bay etei karam boro hinaa, baise afa hai baitumatum kikimin, imih i bay akisinamo te’aau. ³mO yait bay etei ku’aa, taituwa bay afa men eaa isan inanufuruw ina’omih, na’atube o yait bay afa ihamiyen afa’awat ku’aa, men taituwa bay etei eaa isan inanufuruw ina’omih. Anayabin God nati orot auman ibasit ebaib. ⁴nKwa men karam orot ta ana akirwairafin kwanibabatiyimih? Orot Ukwarin akisinamo boro ana akir wairafih ta ere’ere naatu ta ebatabat boro hairi nibatiyih. Naatu Regah akisin boro nafufunih yait i bowabow gewas ebowabow.

⁵oOrot ta enotanot vey a ta’imon i vey a gagamin, men vey a afa na’atube. Naatu orot ta enotanot vey a etei hai itinin i ta’imon. Orot ta’ita’imon i taiyuwih hinanot gewas hinabow. ⁶Orot yait not vey a ta’imon ya’asair imaim God ekwakwafir, i narusagiy. Naatu o yait a kok bay ta ta ku’aa i auman Regah kururusagiy, anayabin nati bay isan Regah ifefeyan igegewasinika. Naatu o yait sawar afa itafuta afa’awat ku’aau auman Regah kururusagiy, naatu merarayow kubitin. ⁷Yawasit tama’am o tamomorob i men it taiyuwit isat. ⁸pImih yawasit tama’am i Regah isan tama’am, naatu tamomorob, i Regah isan tamomorob. Yawasit tama’am o tamomorob it i Regah nowan.

⁹Ana’an iti isan Keriso morob naatu yawasin misir maiye, naatu sabuw yawayawasih, murumurubih etei isah ebi’aiwob. ¹⁰qAisim

^f 13.10 1Cor 13.4-7 ^s 13.11 Eph 5.14; 1Th 5.6-7 ^h 13.12 1Jn 2.8 ⁱ 13.13 Luk 21.34; Eph 5.18 ^j 13.14 Eph 5.11 ^k 14.1 Rom 15.7 ^l 14.2 Gen 9.3-4 ^m 14.3 Col 2.16 ⁿ 14.4 Mat 7.1; Jas 4.11-12 ^o 14.5 Gal 4.10-11 ^p 14.8 Gal 2.20 ^q 14.10 2Cor 5.10

taituwa bayuwat eani'aan kwabibabatiyih? Naatu aisim taituwa kwanunufuruwih? Anayabin it etei boro God ana baibatiyen urama'ama nanamaim tanabat nibabatiyit. ¹¹ Bukamaim hikikirum,

Regah iti na'atube eo,

"Ayu yawasu ama'am, sabuw etei boro nou'umaim suh hinayowen hinakwafiru;

naatu sabuw tutufin etei boro hinaorereb ayu i God."

¹² Isan imih it ta'ita'imon ata yawas abisa tasisinaf etei boro God ana tur tana'owen.

¹³ Isan imih taituwat bairi men taiyuwit ata baitumatum nena tanafufunen tanigamigamimih. Naatu ata not tanarumutufur taituwat men tanikubibiruwih hai baitumatum nare'emih. ¹⁴ Regah Jesu wanawananamaim God isou sinaf irerereb asoso'ob i iti, sawar etei i gewasih bay isan. Baise orot yait nanot bay afa nabitafutaf na'at, nati bay i orot ana tafutaf matar imih men naa. ¹⁵ Baise o a bay ku'aa'umaim taituwa iu yababan kubitin, o i men yabow ana efamaim kuisinaf. Imih men a bay ku'aa'umaim taituwa ana not inikwaris, anayabin Keriso nati orot auman isan morob. ¹⁶ Naatu men iniwa'an abisa o gewasin iroww kunotanot nabotabir kakafin namatar isan hinao'omih. ¹⁷ Anayabin God ana aiwob wanawanan atomamaim i men an gagamin, baise an gagamin i a ef namutufur, tufuw, yasisir Anun kakafiyinane kwanab kwanama. ¹⁸ Anayabin orot yait Keriso isan iti na'atube ebowabow God i ebiyasisir naatu sabuw nati orot ana bowabow isan boro hinakakafiy.

¹⁹ "Nati isan it ta'ita'imon tanibaibaisbonen koufair tanab not ta'imon tanabow tufuw namatar, ayubit tanawowab nayen nara'at. ²⁰ Men aatomamaim naatu bayumaim God ana bowabow tanagurusimih, bay etei i gewasih men tafutafumih. Baise ana kakafin i men abisa o ku'ani'aan imaim inasinaf orot babin ta ana not inikwarisimih. ²¹ Ana gewasin finimih men kwanaa naatu *wine* men kwanatom, o sawar afa kwanasinaf taituwa hai not kwanikwarisimih.

²² Imih sawar abisa'awat isah o kubitumatum nati i o God airi a founamaim nama. Naatu iso'ob abisa kuisinaf i men erekasiy auman kuisinaf o i boro baigegewasin inab. ²³ Baise orot yait erekasiy auman naa natomatom na'at baibatiyen boro nab anayabin i taiyuwin ana baitumatum ebigigim. Naatu abisa men baitumatumamaim kuisinaf i bowabow kakafin.

Taituwa Iniyasisirih

15 ¹ It iyab ata baitumatum fairih karam ata ofonah hai baitumatum ririmin tanibaisih hai bit turin tanab. Men akisit isat tananot

^r 14.11 Isa 45.23; Php 2.10-11 ^s 14.14 Act 10.15; Tit 1.15 ^t 14.15 1Cor 8.11-13

^u 14.19 Rom 12.18; 15.2 ^v 14.20 1Cor 8.13

taniyasisiramih. ²Naatu tanabow ata ofonah hiniyasisir, naatu tanibaisih hai baitumatum nawowab nayen. ³Keriso i men taiyuwin ana yasisir isan bowamih. Baise nati efanin, Buk Atamaninamaim iti na'atube eo na'atube sinaf. "Sabuw iyab tur kakafih hi'u hibi'a'akir ana bit etei ayu tafau yan re." ⁴Anayabin tur abisa marasika hikikirum i bai'obaiyit isan, saise nawawainabit ana vey, nati Buk Atamanin ana turamaim koufair tanab nuhit nafot tanama.

⁵God koufair naatu yatenub ana matuwan, isan ayoyoyoban i boro a kou'ay nita'imon, Jesu Keriso kwani'ufunun. ⁶Naatu dogor ta'imon namatar auta'imon fana kwanabora'ah God, ata Regah Jesu Keriso Tamah ana merar kwanay kwanabora'ara'ah.

Tur Gewasin Ufun Sabuw Isah

⁷Taituwa hai merar kwanay kwanabuwih, Keriso a merar yi bubuwi na'atube. Saise bora'a'araten God kwanitin niyasisir. ⁸A tur ao'owen, Keriso i na Jew sabuw hai bai'akirayan orot matar, God ana tur gewasin isan bow, ana omatanen uwatanah wabih gagamin itih hikirum inu'in sinaf na yabin matar. ⁹Saise Eteni Sabuw God hitabora'ara'ah i ana kabeber isan. Buk Atamaninamaim hikikirum na'atube

"Isan imih Eteni Sabuw wanawanahimaim ayu boro anabora'ara'ahi; O wabimaim bora'ara'aten ew anatabor."

¹⁰Ibanak eo maiye;

"Kwaniyasisir, Eteni Sabuw, God ana sabuw bairi."

¹¹Naatu iban maiye eo,

"Regah kwanabora'ara'ah, kwa Eteni Sabuw etei, Kwanabora'ara'ah, sabuw tutufin etei'imak!"

¹²Naatu iban Isaiah eo maiye,

"Jesse an wairoron boro nakuboun nayen, sabuw etei nakaifih

naatu Eteni Sabuw etei boro i wanawananamaim nuhih nafot hinama."

¹³Ayoyoyoban abaitumatumamaim God nuhifot bit i yasisir naatu tufuw nit, saise Anun Kakafiyin ana fairamaim yasisir ebit dogor wanawanan awan nakaratan nakarsuwai nare.

Paul Ufun Sabuw Isah Binan

¹⁴Taitu ayu aso'ob, kwa a gewasin i ra'at, naatu so'ob tutufin etei kwabai karam, imih karam taituwa boro kwani'obaiyih. ¹⁵Baise iti fef

^w 15.2 1Cor 10.24, 33 ^x 15.3 Psa 69.9 ^y 15.4 2Tim 3.16 ^z 15.7 Rom 14.1 ^a 15.8 Mat 15.24 ^b 15.9 Psa 18.49; Act 3.25 ^c 15.10 Deu 32.43 ^d 15.11 Psa 117.1 ^e 15.12 Isa 11.10; Rev 5.5

wanawanan i sawar gagamih afa bebeyan a tur ao'owen saise nuhi anakusib. Anayabin God ana gewasin ayu wanawana'umaim yari'iy ¹⁶/Keriso ana akir orot amatar Ufun Sabuw isah anabowamih. Naatu firis na'atube anabow God ana Tur Gewasin anao'orerereb. Saise Ufun Sabuw hinan siwar na'atube hinamatar God hai merar nay nabuwih, naatu Anun Kakafiyin nakusouwih kakafiyih hinamatar.

¹⁷Isan imih au bowabow God isan, Jesu Keriso wanawananamaim abowabow i abiyasisir gagamin maiyow. ¹⁸Anayabin iti isan ayu boro men kafa'imo sawar afa isah anao'omih. Baise abisa Keriso iyunu ao naatu abow Ufun Sabuw abonawiyih hina God tebobosiyasiyar akisinamo boro anao. ¹⁹Anun Kakafiyin ana fairamaim, ina'inan naatu baifofofor fokarih himatar. Jerusalem imaim au nanawan abusuruf God ana tur abinan aremor ana tafaram wabin Ikonium atit. ²⁰§Akokok kwanekwan efan menamaim Keriso ana tur men hinonowar imaim anabinan hinanowar. Anayabin ayu men bar wowabayan orot boro orot ta ana bar bubu rarouw nonowatin tafanamaim anawowab. ²¹^hBukamaim hikikirum na'atube,

“Sabuw iyab ana tur men hi'orerereb hinonowar, boro hina'itin, naatu sabuw iyab ana tur men hinonowar boro hinaso'ob naniyan hinab.”

Paul Au Rome Na Isan Yakitifuw

²²ⁱAna'an nati isan ayu kwa isa namih mar etei ayu hirorowenbibiru.

²³Baise boun efan iti wanawanan ayu au bowabow i sawar naatu kwamur manin maiyow akok kwanekwan atan ata'iti isan ama akakaibababan. ²⁴Imih bounabo anotanot boro anan ana'iti. Spain bainanawan isan ananan founamaim boro anarun ana'iti. ²⁵/Boun i ayu au Jerusalem anan God ana sabuw hai bowabow ta ta isan. ²⁶^kEkalesia sabuw nati Masedonia naatu Akaiya wanawanan Jerusalem sabuw yababan wairafih hai tur hinonowar i yasisir auman baibaisih isan hai siwar kaifai hiyai. ²⁷^lIti sinaf isan i hiyasisir, naatu kabay hiyai hibiayafar ana itinin i wayow na'atube hisinaf. Anayabin Jew sabuw ayubih ana baigegewasin i wan Ufun Sabuw hifaramih bairi hibai. ²⁸Imih ayu bowabow anisawar hai siwar kafai abai anan anitih. Imaibo au Spain ananan ef aumatan boro anarun ana'itibo anan. ²⁹^mAyu kwa isa ananan, i aso'ob Keriso ana baigegewasin tutufin etei boro auman anan.

³⁰ⁿTaitu, abifefeyani ata Regah Jesu Keriso wabinamaim naatu Anun Kakafiyin ana yabowamaim au biyababanamaim kwanikofan naatu isou

^f 15.16 Rom 1.5; 11.13 ^g 15.20 2Cor 10.15-16 ^h 15.21 Isa 52.15 ⁱ 15.22 Rom 1.13

^j 15.25-26 1Cor 16.1-4 ^k 15.26 Act 24.17; 1Cor 16.1; 2Cor 8.1; 9.2, 12 ^l 15.27 1Cor 9.11

^m 15.29 Rom 1.11 ⁿ 15.30 2Cor 1.11; Col 4.3; 2Th 3.1

kwanayoyoban God nibaisu. ³¹Kwanayoyoban saise Eteni Sabuw Judea wanawanan tema'am umahine God natafafaru naatu God ana sabuw Jerusalemamaim tema'am au bowabow isan hiniyasisir au merar hinay. ³²Saise God nakokok na'at ayu boro ereyasisir ana matabir maiye not boubun auman anan kwa aninanawani. ³³Tufuw ana God kwa etei isa nama wanatowan. *Amen.*

Sabuw Ta'ita'imon Hai Merarayow

16 ¹Ayu akokok rubut Fibi Sensera ekaleisia isah bow ebibaisih isan anao kwananowar. ²God ana sabuw merarayow gewasin taituwa kwabitih na'atube, Regah wabinamaim rubut ana merar kwanay kwanab. Naatu biyamaim baibais nakokok na'at kwanitin, anayabin i sabuw moumurih na'in ebibaisih, ayu auman.

³°Au merarayow abiyafar Priscilla naatu Aquila hairi isah, ayu bow turou'unah Keriso Jesu isan bairi abowabow. ⁴Naatu morob hirib hai yawas hikwahir ayu tibibaisu. Men ayu akisu, baise Ufunane Ekaleisia etei auman i hai bowabow isan tibiysisir.

⁵Ekaleisia iyabowat nati hai baremaim bairi tibita'ay hai merar ayiy, naatu au of Epanetus auman ana merar ayiy. Anayabin Asia wanawanan i mat dogor baikitabir bai Keriso itumitum.

⁶Mary auman ana merar ayiy, kwa isa bowabow gagamin maiyow ebowabow.

⁷Merarayow ta enan au ofonah Jew orot rou'ab isah, Andronicus naatu Junia hairi bairi dibur ama'am isah. Iti orot rou'ab i tur abarayah etei wanawanahimaim hairi i hisu'ubih kwanekwan naatu i mat Kirisiyan himatarabo ayu.

⁸Au merarayow enan au begon Ampliatus, Regah wabinamaim abiyabow.

⁹Merarayow ta enan Regah ana bowabowayan orot wabin Urbanus isan, bow turat naatu au of Stachy isan.

¹⁰Merarayow ta enan Apeles isan, iti orot i fokarih wanawanah run washamiyen hire Keriso isan ebiturobe. Merarayow ta enan iyabowat Aristobulus ana nibur wanawananamaim bairi tema'am isah.

¹¹Merarayow ta enan Herodion, Jew orot naatu enan Narsisas taintuwan bairi isah.

¹²Au merarayow ta enan Traifena naatu Tryphosa hairi Regah ana bowabowamaim tebowabow isah.

Au merarayow ta au begon Persis isan, Regah isan bowabow gagamin ebowabow.

¹³^pAu merarayow ta abiyafar Rufus isan, Regah nowanamih rubin bai, hinah hairi, Rufus hinah, baise ayu auman hinai.

¹⁴Au merarayow ta enan Asyncritus, Phlegon, Hermes, Patrobas, Hermas naatu Kiriisiyan afa etei bairi isah.

¹⁵Au merarayow ta enan Philologus, Julia, rubun Nereus hairi naatu Olympas, naatu God ana sabuw biyanamaim tema'am etei hai merar ayiy.

¹⁶^qWanawanamaim ta'ita'imon tufuw ana karamamayenamaim kwanimerarayowbonen kwanama, Keriso ana ekaleisia sabuw iti'imaim etei kwa a merar tiyiy.

Tur Yomanin

¹⁷^rTaitu abifefeyani, mata toniwa'an sabuw kousebayah naatu sabuw baitumatum gurusenayah naatu bai'obaiyen kwabaib isan tibibas isah. Nati sabuw i kwanahaiwih. ¹⁸^sAnayabin sabuw iyab iti na'atube tisisinaf i men ata Regah Keriso isan tebowabowamih, baise i taiyuwih hai gewasin isan tebowabow. Hai tur mumunin naatu baifuwen turamaim sabuw bar ma'anih^t hai not tibikwakwaris. ¹⁹^uKwa a baiten nowanowar isan sabuw etei hinowar, imih kwa etei isa ayu abiyasisir; baise akokok kwa etei gewasin isan ukwar hinarerekab, naatu kakafin kwanahaiw men ana ubar kwanab.

²⁰^vTufuw ana God boro'omo Satan an babanamaim nayai sikan nawasafut.

Manaw kabeber ata Regah Jesu'une kwa etei isa nama.

²¹^wTimothy bow turou ana merarayow kwa isa ebiyafar, na'atube ayu taitu Lucius, Jason naatu Sosipater auman a merar tiyiy.

²²Ayu Tertius fef iti kirumayan kwa etei Regah wabinamaim a merar ayiy.

²³^xGaius ana baremaim ayu ama'am, i kwa a merar eyiy, naatu ekaleisia iti ana baremaim tiruru'ay auman kwa a merar tiyiy.

Naatu Erastus bar merar ana kabay kaifenayan auman a merar eyiy, tai Quartus auman a merar eyiy. ²⁴“Manaw kabeber ata Regah Jesu Keriso'one kwa etei isa nama. *Amen.*^y

Bora'ara'aten Ana Yoyoban

²⁵^zGod ana merar tanay, anayabin i karam boro Jesu Keriso ana tur gewasin kwanonowaramaim nasinafi a baitumatum tafanamaim

^p 16.13 Mak 15.21 ^q 16.16 1Cor 16.20; 1Pet 5.14 ^r 16.17 Mat 7.15; Tit 3.10 ^s 16.18 Php 3.19; 2Pet 2.3 ^t 16.18 sabuw makwaniyih dogoroh tibikwaris ^u 16.19 Rom 1.8; 1Cor 14.20 ^v 16.20 Gen 3.15 ^w 16.21 Act 16.1-2; 19.22; 20.4 ^x 16.23 Act 19.22; 1Cor 1.14 ^y 16.24 kirumayah iti tur ufibo tafan hiya'abar hikirim ^z 16.25 Rom 1.5; Eph 1.9; 3.5, 9; Col 1.26

kwanabatkikin. Marasika anamaim iti tur wa'iwa'iramaim hibun wa'ir in.
²⁶Baise boun dinab orot hikirum naatu God wanatowanin ana obaiyunen
tur etei i hina tibirerereb. Saise sabuw hinitumatum naatu Regah fanan
hinabosiyasiyar. ²⁷God akisinamo isan i ukwarerekab ema'am, i akisinamo
bora'ara'aten tanitin wanatowan Jesu Keriso wabinamaim! *Amen.*